

RIJEČ UREDNIKA

Eldan MUJANOVIĆ

Poštovani čitaoci,

dvobroj koji slijedi predstavlja novo izdanje časopisa „Kriminalističke teme“, koje sadrži ukupno šest radova koji obrađuju aktuelne teme iz oblasti kriminalistike, kriminologije, sigurnosnih studija, i koji su sa stanovišta kvalitete izrade i potrebnog stepena stručne i naučne relevantnosti, odabrani od strane Redakcije časopisa da budu publikovani u ovom izdanju. Na ovaj način je nastavljen trend kojim je održan relativno visok standard i kriterij za autore koji u našem časopisu objavljuju svoja istraživanja, promišljanja i osvrte na aktuelne teme u navedenim naučnim oblastima, što u konačnici dovodi do povećanja kredibiliteta našeg časopisa. Uzimajući u obzir karakter radova, u ovom broju objavljujemo jedan izvorni naučni rad, tri pregledna naučna rada i dva stručna rada. Radovi koji su kategorizirani kao naučni oslovljavaju teme koje pripadaju području kriminalistike, sigurnosnih studija, uključujući i krizni menadžment, dok stručni radovi pripadaju području privatne sigurnosti i penologije.



„Kriminalističke teme“ su časopis koji pruža idealnu priliku za afirmirane autore da artikuliraju i prezentiraju svoje naučne spoznaje s ciljem proširivanja postojećih znanja u oblastima kriminalistike, kriminologije, sigurnosnih studija i drugih srodnih nauka, ali i priliku za mlade istraživače koji se nalaze na početku karijere i žele steći naučnu i istraživačku afirmaciju kako u okviru domaće, tako i u okviru međunarodne naučne javnosti. Potrebno je naglasiti da časopis koji se nalazi pred Vama predstavlja jedan od rijetkih međunarodno indeksiranih časopisa u Bosni i Hercegovini u „matičnim“ naučnim oblastima, i da kao takav, na jedinstven i originalan način, učestvuje u razvoju bosanskohercegovačke naučne misli i prakse.

U duhu prethodno navedenih principa, pojedinačni pregled članaka započinjemo radom pod naslovom „Alkohol kao uzrok saobraćajnih nesreća u Kantonu Sarajevo“ koji se bavi važnim pitanjima koja se razmatraju u okvirima saobraćajne kriminalistike, a to je utjecaj alkohola na nastanak saobraćajnih nesreća i zastupljenost alkohola kao akcidentogenog faktora kod ove vrste nesreća. Naredni rad „Metodologija kriznog komuniciranja i analitika medijskih iskaza“ referira se na aktuelnu temu iz oblasti kriznog menadžmenta, pri čemu posebno tretira ulogu i značaj institucija masovnog komuniciranja i medijskih iskaza u kreiranju konfliktne paradigme. Rad pod naslovom „Sigurnost i stabilnost kao globalni izazov“ bavi se analitičkim okvirom savremenih sigurnosnih problema i ukazuje na neophodnost odlučnog, organiziranog i koordiniranog suprotstavljanja savremenim sigurnosnim prijetnjama, kako na lokalnom, tako i na globalnom nivou. Nadalje, kao nastavak na prethodni objavljujemo i rad pod naslovom „Transnacionalni organizovani kriminal kao sigurnosna prijetnja u suvremenim uvjetima (sa posebnim osvrtom na BiH)“, koji nastoji približiti temu transnacionalnog organizovanog kriminala kao jedne od glavnih sigurnosnih prijetnji današnjice, te posebno ukazati na opasnost koju transnacionalni organizovani kriminal predstavlja za postkonfliktne države koje se

nalaze u procesu društvene i političke transformacije. Stručni rad pod naslovom „*Privatna sigurnost kao dio globalnog sistema zaštite i najprofitabilnija uslužna djelatnost današnjice*“ predstavlja nastavak elaboriranja tema iz oblasti sigurnosti i prikazuje mjesto i ulogu privatnih sigurnosnih kompanija i pružanja sigurnosnih usluga u kako na području Bosne i Hercegovine, tako i na međunarodnoj razini. Na kraju, stručni rad pod naslovom „*Kazna i nagrada u funkciji resocijalizacije osuđenih lica*“ predstavlja vrijednu kontribuciju razumijevanju svrhe, efekata i kriterija kažnjavanja i nagrađivanja osuđenih lica u kazneno-popravnim ustanovama, ali i razumijevanju utjecaja pomenutih postupaka na proces resocijalizacije i njegovu uspješnost.

Za kraj, želim iskazati zahvalnost svim članicama i članovima Redakcije časopisa „Kriminalističke teme“ na saradnji i permanentnoj podršci koju su pružili u okviru pripremanja ovog dvobroja. Također, posebnu zahvalnost dugujem svim recenzentima koji su bili angažirani u procesu recenziranja i evaluiranja dostavljenih radova i koji su svojim sugestijama velikodušno doprinijeli unaprjeđenju njihovog kvaliteta. Ovu priliku ću iskoristiti da sve zainteresirane naučnike i stručnjake pozovem da svojim radovima sadržajno obogate buduća izdanja našeg časopisa.

Glavni i odgovorni urednik,
Dr. sc. Eldan Mujanović